

T 9299

3122

25



CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY  
SEP 2 1941

喪事部

國之喪

建安祝穆和父編

羣書要語

天子死曰崩 曲禮 告喪曰天王登假 音假 措之廟立之主曰帝 同上

其死登假三年而形遷 葬于楚辭遠遊云載營魄而登霞兮掩浮雲而上征 朱氏注曰霞與遊同 猶曰適遠云爾 告喪之辭乃又借以為



新編古今事文類聚卷之四十九

前集

建安祝穆和父編

喪事部

哈佛大學漢和圖書館珍藏印



國哀

羣書要語

天子死曰崩曲禮告喪曰天王登假音霞措之廟立之主曰帝同上

其死登假三年而形逝莊子楚辭遠遊云載營

魄而登霞兮掩浮雲而上征朱氏注曰霞與遐

同猶曰適遠云爾曲禮告喪之辭乃又借以為



死之美稱莊子作登假盖亦此例但此篇注者  
遂解為赤黃之氣釋莊音又讀假為格而訓至  
焉則誤愈遠矣辨證周書曰謚者行之跡是以  
大行下孟反受大名細行受細名李善文選注  
皇帝新崩未有定謚故總其名曰大行皇帝風  
俗通千歲厭世而去乘彼白雲游乎帝鄉莊子  
宮車宴駕注天子當晨起早作而方崩殞故稱  
宴駕者凡臣子之心猶謂宮車晚出也漢天文  
志賈誼疏曰朝委裘而天下不亂孟康曰委裘  
若容衣天子未坐朝事先帝衣裘也漢書

古今事實

鼎湖攀龍

黃帝采首陽山銅鑄鼎於荆山下鼎既成有龍  
垂胡髯下迎黃帝黃帝上騎羣臣後宮從上龍  
七十餘人龍迺上去餘小臣不得已乃悉持龍  
髯拔墮黃帝弓百姓仰望黃帝既上天乃抱其  
弓與龍髯號故後世名其處曰鼎湖其弓曰烏  
號漢郊祀志

如喪考妣

舜二十有八載堯乃殂落百姓如喪考妣三年



四海遏密八音

書舜典

降割我家

武王崩周公相成王作大誥王若曰猷大誥爾多邦越爾御事弗吊天降割于我家不少延洪惟我幼冲人嗣無疆大歷服已予惟小子若涉淵冰予惟往求朕攸濟

嬛嬛在疚

閔予小子嗣王謀於廟也閔予小子遭家不造嬛嬛在疚於乎皇考永世克孝念茲皇祖陟降庭止維予小子夙夜敬止於乎皇王繼序思不忘

未堪家難

訪落嗣王謀於廟也訪予落止率侍昭考於乎悠哉朕未有艾予將就之繼猶判渙維予小子未堪家多難紹庭上下陟降厥家休我皇考以保明其身

病既彌留

成王將崩命召公畢公率諸侯相康王作顧命王曰嗚呼疾大漸惟幾病日臻既彌留恐不獲誓言嗣茲予審訓命汝用敬保元子釗弘濟于



艱難茲既受命還出綴衣于庭越翼日乙丑王崩

沒於祗宮

穆王欲肆其心周行天下祭公謀父作祈招之詩以正王心王是以獲沒於祗宮注祈父周司馬掌甲兵之職招其名獲沒謂免篡弒

即位而哭

滕定公薨世子使然友之鄒問於孟子孟子曰三年之喪齊疏之服飢粥之食自天子達於庶人三代共之然友定為三年之喪父兄百官皆不欲然友復之鄒問於孟子孟子曰然不可以他求者也孔子曰君薨聽於冢宰歆粥面深墨即位而哭百官有司莫敢不哀先之也上有好者下必有甚焉者也是在世子然友反命世子曰然是誠在我五月居廬未有命戒百官族人可謂曰知及至葬四方來觀之顏色之戚哭泣之哀弔者大悅

尸虫出戶

十月乙亥齊桓公卒易牙立公子無詭太子昭奔宋桓公病五公子各樹黨爭立及桓公卒遂



相攻以故宮中空莫敢棺桓公尸在牀上六十  
七日尸蟲出于戶十二月乙亥無詭立乃棺赴  
辛巳夜斂殯

### 祖龍死

秦使者從關東夜過華陰平舒道有人持璧遮  
使者曰爲吾遺瀉池君水神也秦以水德始皇  
將終故其水神自相告因言曰今年祖龍死祖  
始也龍人君象謂始皇也使者奉璧具以聞始  
皇默然曰山鬼不過知一歲事也

### 車載鮑魚

秦始皇崩於沙丘李斯以上崩在外不發喪載  
輜車中輜車臭詔從官令載鮑魚一石亂其臭  
誣以飾貌

順帝朝有希梁冀旨共作飛章虛誣李固罪曰  
大行在殯路人掩涕固獨胡粉飾貌搔頭弄姿  
後冀畏固名德更奏前事遂誅之

### 女簪白花

晉杜皇后預之曾孫先是三吳女子相與簪白  
花望之如素柰傳言天公織女死爲之著服至  
是而后崩



帝持心喪

仁廟聖誕乃李淑妃也謚章懿太后晏殊撰碑薨時上幼章獻養爲己子雖上亦不知也及即位章獻稱制而楊太后病革上問疾揚密語其事上大慟即見執政欲行服章獻難之於是持心喪

孫公談圃

古今文集

雜著

卞太后誄

曹植

率土噴薄三光改度陵頽谷刑五行牙錯皇室

瀟條羽擻四布百姓戲欬嬰兒訖慕若喪考妣天下縞素聖者知命殉道實名義之攸在亦棄厥生敢揚后德表之旒旌光垂罔極以慰我情乃作誄曰我皇之生神靈是輔作合于魏亦光聖武篤生帝文紹虞之緒龍飛紫宸奄有九土詳惟聖善岐嶷秀出德配姜嫄不忝先哲玄覽萬機兼才備藝汎納容衆含垢藏疾仰奉諸姑降接儔列陰處陽觀潛明內察及踐大位母養萬國温温其仁不替明德悼彼邊氓未遑宴息恒勞庶事兢兢翼翼親桑蠶館爲天下式樊姬



霸楚書載其庸武王有亂孔歎其功我后齊聖  
克暢丹聰不出房闈心照萬邦年踰耳順乾乾  
匪倦珠玉不玩躬御綈練日晏忘飢臨樂勿聽  
去奢即儉曠世作顯慎終如始蹈和履貞恭事  
神祇昭奉百靈跼天踏地祇畏神明敬微慎獨  
執禮幽冥虔肅宗廟蠲薦三牲降福無疆祝云  
其誠宜享斯祐蒙祉自天何圖凶咎不勉斯年  
嘗禱盡禮有篤無痊豈命有終神食其言遺誥  
在疚承諱東藩擗踴郊畛灑淚中原追號皇妣  
棄我何遷昔垂顧復今何不然空宮寥廓棟宇  
無烟巡省階途髣髴櫺軒仰瞻帷幄俯察几筵  
物不毀故而人不存痛莫酷斯彼蒼者天遂臻  
魏都遊蒐舊邑大隧開塗靈將斯戢歎息霧興  
揮淚雨集徘徊輻輳涕洟及神光旣幽佇立  
以泣

齊敬皇后哀策文

謝玄暉

惟永泰元年秋九月朔日敬皇后梓宮啓自先  
塋將祔于某陵其日至尊親奉奠某皇帝乃使  
兼太尉某設祖于行宮禮也翠帟舒阜玄堂啓  
扉俎徹三獻筵卷六衣哀子嗣皇帝懷蜃衛而



延首想鷺輅而撫心痛椒塗之先廓哀長信之  
莫臨身隔兩赴時無二展省視也旋詔左言先  
敷聖善其辭曰

帝唐遠胄御龍遙緒在秦作劉在漢開楚肇惟  
淑聖克柔克令清漢表靈曾高也沙膺慶爰定  
厥祥徽音允穆光華沼沚榮耀中谷敬始紘經  
教先種稷睿問川流神襟蘭郁先德韜光君道  
方被于佐求賢在謁無訛顧史弘式陳詩展義  
厚下曰仁藏性伊智十亂斯俟四教罔忒思媚  
諸姑貽我嬪則化自公宮遠被南國軒曜輕轅

星女王星也

懷光素舒佇德閔予不祐慈訓早  
違方年冲藐懷袖靡依家臻寶業身嗣昌輝壽  
宮寂遠清廟虛歸嗚呼哀哉帝遷明命民神胥  
悅乾景外臨陰儀內缺空慙故劍徒嗟金穴璋  
瓚奚獻禕褕罔設嗚呼哀哉馮相告禋宸居長  
往貽厥遠圖末命是獎懷豐沛之網繆兮背神  
京之弘敞陋蒼梧之不從兮遵鮒隅以同壤嗚  
呼哀哉陳象設於園寢兮暎輿鏃於松楸望承  
明而不入兮度清洛而南游繼池緯於通軌兮  
接龍帷於造舟迴塘寂其已暮兮東川澹而不



流嗚呼哀哉藉闕宮之遠烈兮聞續女之遐慶  
始協德於蘋蘩兮終配祇而表命慕方纏於賜  
衣兮哀日隆於撫鏡思寒泉之罔極兮託彤管  
於遺詠嗚呼哀哉

昭明太子哀冊

梁王均

蜃輅戔戔龍駮跼步羽翹前驅雲旗比僚皇帝  
哀繼明之寢曜痛嗣德之徂芳御武帳而悽慟  
臨甲觀而增傷式稽令典載揚鴻烈詔撰德於  
銘旌永傳徽於舞綴其辭曰

式載明兩實惟少陽儀天比峻儼景騰光睿哲

膺期旦暮斯在識洞機深量包瀛海立德不器  
至功弗宰寬綽居心溫恭成性脩襟孝友率由  
嚴敬咸有種德惠和齊聖括囊流略包舉藝文  
徧該緗素殫極丘墳騰寰充積儒墨區分瞻河  
闡訓望魯揚芬雲物告徵祲沴寒象星霾恒曜  
山頽朽壤威儀上賓德音長往具僚無蔭謚承  
安仰嗚呼哀哉首夏司開交秋紀節容衛徒警  
青華萎絕書幌空張談筵罷設虛饋饒饒孤燈  
翳翳嗚呼哀哉簡辰請日筮合龜貞幽斑夙戾  
玄宮獻成武被齊列文物增明昔遊漳水賓從



無聲今歸郊郭徒御相驚嗚呼哀哉背絳闕以  
遠徂轡青門而徐轉顧馳道而詎前望國都而  
不踐渡脩坂之威夷溯平原之悠緬驥蹠足以  
酸嘶挽悽鏘而流泣嗚呼哀哉混哀音於蕭籟  
變愁容於天日雖夏木之森陰乃寒林之蕭瑟  
旣將反而復疑如有求而遂失謂天地其無心  
遽永潛於哀質嗚呼哀哉

唐憲宗章武皇帝哀冊文

令狐楚

維元和十五年歲次庚子正月甲戌朔二十七

日庚子移殯於大內太極殿之西階粵五月十  
五日庚申遷座於景陵禮也玉衡南指金波西  
落皓雪集其麻衣素雲褰其綃幕柳宮龍動竹  
池魚躍兆庶兩泣於浩穰萬靈風號於寥廓哀  
子嗣皇帝仰攀雕輦歿莫瓊筵哀無容以觸地  
痛不返而終天仙仗徐進宸儀永隔降睿旨於  
鸞臺揚聖功於鳳冊其詞曰

配天惟唐伊祁同光應道爲帝玄元之系聖人  
有作孝子善繼顯赫十朝總齊四裔執其大象  
司彼左契武烈誕敷文明下濟出潛離隱或躍



未融親則盤石封殊剪桐承桃黃屋主坐青宮  
禮樂盡在謳歌荐至軒皇勸勤傳付神器太母  
侍養親臨寶位怡聲下色先意承志家令敢言  
天子屏貴明明出震業業承乾其仁如山其智  
如泉理析堅白學探幽玄揮毫霧動揆藻霞鮮  
所持者儉所寶者賢刑靡不省賞無不延冕旒  
迎日珪璧祈年涕謁宗廟臣朝昊天縱神聖  
日躋孝敬鴻名既加寶曆一定窮人屢賑名士  
交聘獸愛觸邪草憐指佞梯航脩貢鱗羽遂性  
河色呈符山聲告慶編書辨謗創殿思政甘節  
必稱苦言終聽稜威之遠德政之盛霜雪憲章  
雷風號令夏臺齒劍上黨納宥趙際宅心鄴中  
聽命誰能去兵王者有征玉壘霧廓金陵鏡清  
狐鳴上蔡蟻聚東平伏鎖就戮迴戈受烹始以  
上殺歸於好生恢恢不識蕩蕩難名信及隱微  
道存溥博走馬斯却昆蟲咸若調其玉燭徇以  
木鐸混同車書遠頌正朔範金合土大興太學  
清蹕鳴鑾將登高嶽四維旣張五刃已藏蠻夷  
戎羗敢不來王天下清靜朝廷樂康會冠劍以  
高宴戲魚龍於廣場有嚴有翼無怠無荒俗皆



臻於壽域人自爲於犧皇日出入兮安窮極雲  
飛揚兮無處所瑞方瞻乎鳳來災忽聞於鸛語  
謂百年之可卜嗟九齡之不與當疑旒而下臨  
奄脫屣以輕舉萬姓哀其考喪千官懷其后撫  
封人猶祝於南山帝子已號於北渚嗚呼哀哉  
披靈衣兮如在委仙佩兮若休遺環海以靜寐  
謝鼎湖而遠游桂華朗兮高殿寂梧葉暗兮深  
宮愁驚同軌之遽至咽長川而不流嗚呼哀哉  
威儀肅設文物前列酌玉斝以宵奠駕金根而  
曉發出朱雀之正門背青鸞之迥闕逶迤原野

蒼茫日月去復去兮降堯堦悲莫悲兮臨禹穴  
嗚呼哀哉地開蒼谷天作豐山江海自流於泉  
下城郭取象於人間高封馬鬣永祕龍顏鱗有  
逆兮會觸髯欲升兮尚攀朝百靈以肅肅遺八  
駿以閑閑陵植栢兮未拱閭生苔兮已斑嚴日  
宮而深閉藹雲幄以空還興衆感於萬井結宸  
悲於九闈嗚呼哀哉神行無方乾健不息物皆  
被於聖澤人自遂於帝力魏乎高代之行至矣  
動天之德後玄壤以長存冠蒼穹而罔極嗚呼  
哀哉



慰國哀

余讀魏氏雜編見真宗時公卿大夫慰國哀  
登極往還書蓋大臣同憂戚宜有慶弔往在南  
都奉神宗諱見蘇尚書作本路發運帖莫知  
當慰與否也相與商論竟復中輟乃知前輩禮  
法猶在而近世士大夫之寡聞也因錄之寇侍  
郎慰書曰伏以  
大行皇帝奄棄萬邦天下臣子  
畢同號慕昔同華經俱受異恩攀靈馭以無繇  
望天顏而永訣方纏悲緒遽奉台函摧咽之誠  
倍萬常品賀書曰伏以聖人出震大明初耀於

四方王澤如春普慶俄頒於九有凡在照臨之  
下畢同歡忭之心侍郎久滯外藩已成美政廊  
廟佇徵於舊德雲雷始洽於新恩未果馳誠先  
蒙飛翰感銘忻慰無以喻名

后山叢談

布四脚加冠

司馬溫公云仁宗崩有司用乾興故事群臣  
布四脚加冠於是時莫識其制以幅巾幕首破  
其後爲四脚其後鄭毅夫讀續事始云三代黔  
首以阜絹裹髮周武帝裁爲四脚名以幞頭馬  
周請重繫前脚蓋布四脚皆後垂如周制遇暑



則繫其前脚如唐制 英宗崩宋次道誤爲布  
幘頭有司遂用民間暮喪之服以今漆紗幘頭  
去其鐵脚而布裹之前繫後垂而不可加冠壞  
之而冠幘頭之失自次道始也余謂四脚加冠  
今士大夫喪冠是也大布之冠古也四脚今也  
於禮爲繁矣 后山談叢

太上皇帝上僊慰 皇帝表

周必大

天心難測邦禍荐臻甫涉夏秋而喪考妣中慰  
臣竊以慈懿寢園之奉翼馭將歸聖安丹鼎之

成龍胡以斷黎庶攀號而不釋聖神悲痛以何  
堪共惟 陛下孝通神明躬侍寢膳大舜終身  
之慕每竭誠心有唐二聖之歡方隆榮養驟罹  
變故諒極哀恫願寬銜恤之情毋爽宅憂之禮  
臣退休田里阻詣宮庭臣無任

孝宗登遐慰 皇帝表

聖君侍膳方伸永命之新天父登遐忽下遏音  
之詔痛結嚴宸之邃哀纏率土之濱中慰恭以  
尊號德洽民心仁根天性陟帝位二十八載高  
蹈勸勤至寢門一日三朝久膺隆養福共期於



壽考疾俄殆於寤興設黼扆於牖間惟聞未命  
乘白雲於帝所恍隔真遊撫弓劍以空存視羹  
墻而猶見共惟 陛下睿思罔極孝慕素深問  
安節以色憂不能正履宅亮陰而思道茲故弗  
言願懷繼志之圖少抑終身之戚臣忝紆郡綬  
邈在海壖驚奉諱音徒結攀號之戀坐縻官爵  
莫伸奔問之誠

寧宗升遐慰 皇帝表

趙汝談

皇穹弗弔降此鞠凶黎民何辜罹此荼毒中慰

伏以 大行皇帝撫億兆衆踰三十年仁恕結  
乎人心恭儉根於天性清淨無作神明為徒故  
能消巨患若渙冰除宿奸如棄唾宗社祗叶朝  
野宴寧陟方奄聞率土震動共惟 陛下越自  
藩邸入承廟祧亭育之恩深付託之器重孝思  
方切悲慕奚任然而綴衣于庭群公既皆聽命  
即位而哭百官莫敢不哀少抑至情永綏大業  
寧宗升遐慰 皇太后表

趙汝談

顥蒼降割宸極登遐群方震驚萬衆號絕中慰



共惟 太皇太后陛下陰陽合德夙夜同心勤  
相歷年順成多慶驟罹禍棘諒劇悲摧願裁弓  
劔之思勉副簾帷之託

皇太后升遐慰 皇帝表

周必大

慈帷書掩哀計夕聞凡思荷載之功舉抱摧傷  
之痛中慰共惟陛下事親盡禮侍膳殫誠久承  
文母之歡徽音遽隔遠邁顯宗之孝追慕何窮  
願寬陟謁之悲少副普天之望

皇太后升遐慰 皇帝表

周必大

釁結東朝悲纏中夏遙知昧穆正切哀恫中慰  
共惟 陛下性本自天行皆高世漢文至孝晨  
昏無解帶之安虞舜好生遠邇釋畫冠之禁旣  
勤施德可謂寧親倏聞厚地之傾莫曉彼蒼之  
意須思適變母致過哀上以符 慈寧治命之  
言下以副黎庶誠心之懇

壽仁太上皇后上僊慰 皇帝表

周必大

災纏長樂悲動嚴衷中慰伏以 尊號沙麓儲



祥河洲協詠勤宣婦道誕育聖躬共惟 陛下  
欽念母慈備彰誠孝宮中自行三載之制天下  
咸識一人之心願寬罔極之哀永御無疆之曆  
臣限以退伏田里不獲奔赴宮闈臣無任

皇后上僊慰 皇帝表

周必大

桂輪隱耀椒掖厭儀厚載既傾淵衷斯惻中慰  
伏以 大行皇后天姿恭儉地望高華久殫婦  
順之勞正倚坤寧之助奄從 先后莫返中闈  
共惟 陛下孝切亮陰思隆儼極雖聖情之易

感顧天數之難移願寬當宁之思重副含生之  
望臣退居田里阻造宮庭臣無任

孝宗梓宮啓殯慰 皇帝表

舜三年之喪倏臨襄葬商兩楹之殯初啓葦塗  
痛結重宸悲纏率土中慰共惟 太上皇帝陛  
下孝思罔極宸禮無違雖恭默弗言若已忘於  
天下然齊疏躬服自不廢於宮中願紆追慕之  
懷益盡送終之典臣効官踈遠奉報驚摧莫伸  
同執之駿奔徒隕交頤之涕泗

顯仁太后發引慰 皇帝表



周必大

陟彼屺兮爰卜青烏之吉維其時矣遽瞻畫窆  
之行祖道逶迤聖情惻楚中慰共惟陛下德  
鐘天性道冠人倫粵符素柰之謠采切蓼莪之  
感親喪固所自盡也內不廢於三年聖德又何  
加於孝乎外已形於四海逮茲遣奠尤極哀悰  
顧淑靈已隔於東朝惟追慕少寬於南面

同前

周必大

龜猶告吉翟駕即塗念慈矩之長違知聖情之  
永慕中慰共惟陛下高行超於今古純誠貫

于神明自惟文母之哀益顯有虞之孝送終盡  
禮遣奠及期瞻披紼之在庭宜柩圈之增感願  
副群生之望少寬固極之懷

寧宗發引慰皇帝表

龜筮協從既先於遠日龍輅就祖已次於近郊  
罄海宇以悲摧極乾坤之悽愴中慰共惟陛  
下作民明辟執古通喪致堯之思於羹墻而如  
見盡舜之孝豈富貴之解憂屆七月之有期增  
九重之永慕臣輸將無補扈從有行臨表涕零  
實難忘於忠戀承祧體重願少抑於聖懷



寧宗發引慰 皇太后表

宮車晏駕考卜因山廡衛夙嚴屬引載道罄萬  
方而永慕悵七月之有期中慰共惟 陛下以  
母儀之尊盡婦道之順雞鳴警戒憶往日以增  
悲龍駕飄搖痛終天之永訣 同前

英宗掩殯慰 皇帝表

王安石

須百禩之材已襄葬故設九虞之主方考祔儀  
中慰共惟 陛下德茂欽明道隆勤孝雖送終  
之禮已備而追遠之念甫深惟順變以節哀實

含生之至願臣限分鎮守阻預朝班

同前慰 太皇太后牋

王安石

宮車云返陵邑既營凡在照臨豈勝摧慕伏惟  
殿下道侔坤育仁出天成永懷愛孝之隆尤積  
悲恫之感稍舒慈念實慰輿情臣叨備從官限  
分符守徒有攀號之至痛初無辦護之微勞

太皇太后掩殯慰 皇帝表

周必大

駟馭上賓武帳久虛於長樂龜猶未詗容衣遂



闕於稽山一人嗟慈範之違萬國嘆坤儀之遠  
中慰共惟 陛下純誠冠古至行積中慕親之  
心未嘗息焉執喪之禮可謂盡矣神靈爲之顯  
相天日至於晏溫用葛無麻蓋異魯君之母因  
山配地實同唐室之規仙寢旣成真游莫返追  
懷聖善固益動於孝心俯爲邦家當勉裁於哀  
慕

同前

周必大

日月有期爰畢因山之制寢園在望共勤陟岵  
之瞻追懷太妣之徽音益惻武王之達孝共惟  
陛下德隆天性念極母儀旣哀戚之內深亦禮  
文之外盡爲之宅兆奉長樂之禕衣見于著龜  
祔 裕陵之吉壤逮茲甫窆孰不纏悲雖上聖  
輦輦痛長違於慈矩然下民悃悃願勉抑於至  
情

寧宗掩殯慰

皇帝表

禹穴因山令圖改卜漢陵復土大事旣襄凡戴  
照臨舉深摧咽中慰共以 謚號皇帝休功邁  
世至仁如天方垂衣以致太平迺歿躡而超萬  
乘六飛八駿尚仙馭之來歸萬歲千秋竟神遊



之永闕共惟 陛下義隆送往孝極奉先慨日  
月之有期倏寢園之告備臣將指扈送引睇闕  
庭鐘慶發祥已兆龍岡之吉節哀順變願儲蠖  
濩之思

同前慰 太皇太后表

橋山弗返遺弓劍於軒臺茂陵初成闕衣冠於  
漢殿悲纏九土哀慟六宮中慰恭以 謚號皇  
帝繼統百王承休累聖華封有請共擬祝於堯  
年梧野陟方乃竟成於舜葬共惟 陛下倪天  
作合儼極居尊屬時大事之喪彌劇慈懷之感

臣同前願貽燕翼之謀

太上皇帝掩殯慰 皇后牋

虞帝陟方狩已遂於梧野太公卜葬役始就於  
櫟陽復土言端望雲靡及中慰切以 尊號儲  
精物表玩化天倪太山其類驗孔聖兩楹之奠  
祈招不作信穆王八駿之遊茲永闕於慈顏宜  
有傷於冲抱共惟 陛下順承靡倦定省弗違  
婦子熙熙尚憶椒盤之奉山川鬱鬱空聞屨主  
之歸永懷如在之靈豈曰無從之涕伏望茂加  
節抑勿過憂傷惟孝道之大端初不專於哭踊



况王心鉅創尤所賴於慰寬

太皇太后掩殯慰皇帝表

兵衛載廡風靜胥江之浪輜車已窆雲深禹會  
之山甫周復土之儀益重居廬之感中慰伏以  
謚號蚤推食淡晚樂含飴厭代賓仙棄四海九  
州之養因山定制妥千秋萬歲之靈仙馭莫追  
淵衷永惻共惟陛下仁心內恕德教旁加稱  
孝孫稱哀孫不忘繼志讀喪禮讀祭禮尤謹送  
終既永傷而永懷且如疑而如慕伏願為宗祊  
而自重順時變以安行謂葬曰藏既克襄於大  
事至禮而止更節抑於餘哀

英宗祔廟慰皇帝表

王安石

七月而葬既克奉於寢園萬世不祧遂崇成於  
宗廟凡居覆壽同立攀號中慰伏惟陛下膺  
保聖神踐行仁孝纏哀罔極率禮無違仙遊既  
集於宗祊聖念彌勤於翼室仰祈順變俯騰含  
生臣符守所櫻班朝莫預臣無任

同前慰太后表王安石

威靈有集方祔於廟祧感慕無窮外覃於蠻貊



中慰伏惟 殿下比賢任如膺慶塗莘祗協孫  
謀克襄大事地非蒼梧之遠勢有灞陵之安唯  
割至文尚膺遐福臣備官有守奔問無階

太皇太后祔廟慰 皇帝表

周必大

設祭以虞久駐言歸之馭祔姑而祀永綏如在  
之靈適觀彛典之成彌顯聖人之孝中慰共惟  
陛下行為世法性本生知宅憂每越於常情制  
禮率遵於故事瞻文王之清廟久矣寧神願太  
妣之徽音茲焉登配既送終之無憾在追遠以  
宜寬臣無任

太皇太后附廟慰 皇帝表

周必大

厭主來歸既講九虞之祭椒塗永闕遂參諸后  
之游悲動紫宸禮嚴清廟中慰共惟 陛下誠  
通幽顯道述 祖宗問寢承顏事母昔同於事  
地謹終追遠寧親今至於寧神雖云彛訓之遵  
時乃明王之孝閔宮有恤已聞升祔於姜嫄南  
面何為願節哀侗於虞舜

慈烈皇后祔廟慰 壽成太后牋



事嚴葬聖甫畢於山陵禮重祔姑益尊於宗廟  
聿隆安奉深示顯承中慰切以尊號位歷四  
朝謀詒萬世寶慈建極尚垂坤厚之光精爽在  
天宜正渙亨之假共惟殿下巍巍冲德翼翼  
孝誠如慕如疑獨厚送終之意以享以祀式嚴  
升配之儀諒因制寢之成益重視奩之感願稽  
國典少釋聖懷雨露旣濡雖未忘於悽愴春秋  
而祭尚少慰於哀思

同前慰 太上皇后殿

易名以謚備極於尊崇卒哭而虞式嚴於升祔  
道全欽愛孝達幽明中慰切以尊號天壽丸  
齡母儀四世三十五載享榮養於東朝億萬斯  
年妥明靈於大寶共惟殿下適追在念思媚  
有懷喪紀不忘儼憂服於几筵之次禮文是守  
寓敬心於宗廟之中適廡典之載陳諒忱情之  
有測願循至理更節餘哀不顯不承庸盡如生  
之事以享以祀尚寬將見之思臣無任

寧宗祔廟慰 皇帝

廡衛及虞九筵載秩宗祔升祔萬世不祧中慰  
共以 謚號靈德在天睿謨垂世鼎湖弓劍已



迄大事之襄高廟衣冠再侈崇儀之奉昭穆以  
序妥侑惟時共惟 陛下若稽大猷答揚先訓  
主鬯以承祭祀於昭震游之符假廟以致精神  
深明萃聚之義既右烈考載陟新宮寧親大於  
寧神既率先於孝治盡倫從而盡制願俯就於  
禮經少抑哀思以祚群品

同前慰 皇太后表

梓宮就殯桑主返虞宗萬世以不祧祔九廟而  
爲穆中慰恭以 謚號恩覃有截德合無疆翠  
柏留陰悲茂陵之秋夕朱櫻乍薦驚原廟之春  
嘗共惟 陛下盡志謹終永懷追遠悵天容之  
遂隔諒聖情之難居願推禮制之宜少抑哀思  
之過共建皇極永祚生靈

卒哭慰 皇太后表

僊游寔邈難忘必世之仁天運既更奄及踰時  
之慕慨喪事之即遠知聖情之難居中慰共惟  
陛下德合无疆功高遠古泰通以治錯海內於  
久安謙尊而光有天下而不與義雖隆於伉儷  
禮當酌於權宜願錫福於含生以節哀而順變

同前慰 皇帝表



龍胡莫返一以遠於僊游駒隙易馳十遂周於  
旬晷感時增疚率土同情中慰共惟 陛下嗣  
服无疆繼聖有作本生知於愛敬爰躬履於艱  
難率天下以爲堯喪舉行三年之制慕終身而  
見舜孝度越五帝之隆驚晦朔之屢更軫哀恫  
之一念願副有生之望少寬罔極之悲

孝宗小祥慰 太上皇帝表

舜御上賓嗟帝鄉之寢遠義輪右徙驚天道之  
一周諒冠練之初臨結宸衷而永慕中慰共惟  
陛下慨思顧復退宅諒陰雖謳歌獄訟之聲已  
歸於子宜飭粥齋跡之服自盡於親願紓罔極  
之哀俯就有終之制臣分符輔郡阻迹闕庭薦  
祥莫効於駿奔除重徒深於哽咽

同前慰 皇帝表

繼禹道以敬承肇惟元祀躬舜喪而追慕倏換  
終星屬周祭之初臨諒聖情之采結中慰共惟  
陛下念存夙敬哀極時思奉燕翼於詒謀服方  
績舊隆齊縗於承嫡穀旣升新願寢抑於悲恫  
冀益導於成德臣同前

寧宗小祥慰 皇太后表



神機厭代致喪方謹於三年禮制權宜練祭姑  
從於易月中慰共惟 陛下處心柔順稟德惠  
慈永懷伉儷之隆尤極哀恫之感願少加於節  
抑以大庇於生靈

同前慰 皇帝表

僊御登真甫月輪之既望喪期有數俄歲籥之  
告周臣中慰恭惟 陛下義本篤親孝深盡道  
雖勉從於暮練終難抑於哀情願寬罔極之思  
以慰含生之望

孝宗大祥慰 太上皇帝表

僊輿不返莫窮千歲之遊喪服有終倏屆再暮  
之慕諒聖情之追遠經時變以興悲中慰共惟  
陛下慕切羹牆感深風木雖心非黃屋已貽翼  
子之謀然躬御縞纓每盡喪親之道願抑露濡  
之感永膺日養之嚴臣無任

同前

蒼梧天遠倏流駟隙之光黃道星回再換龍躔  
之次愴寔遙於祖武諒增慕於宸衷中慰共惟  
陛下孝盡時思恩隆世嫡敬承禹道有光三五  
六經之傳躬服舜喪亦既二十五月之畢願益



遵於成德用俯慰於輿情

寧宗大祥慰 皇太后表

三年之制痛方抱於烏號易月而除悵已終於素蹕念仙游之寢邈知聖情之難居中慰共惟陛下保佑功勤付託任重宗社大計亦既慶於有祥世俗深悲願少寬於無益

慰 皇帝表

僊游莫返倏驚流景之遷禮典有常奄及終喪之制感時增慕易月從權中慰共惟陛下授神器之公承宗祧之重雖嫫嫫在疚難忘人子

之至情然業業萬幾當為天下之大計願少寬於宸慮以永御於丕圖

釋服慰 皇帝表

風慘雲愁綴衣如昨日周月竟禫服從常中慰共惟陛下誕受丕基率循大辯昊天罔極既盡制於通喪示民有終姑權宜而即吉惟聖政作新之始繫民情後戴之初願抑餘悲以全達孝

同前慰 皇太后表

鼎湖龍去雲天莫攀宮隙駒馳日月已竟奄外



除而即吉酌中制以從常中慰共惟陛下輔  
佐先朝憂勤內治感今懷昔諒深伉儷之悲順  
變節哀勉為宗祊之計

元正慰表

周必大

行夏時而正曆荐易歲華履春露以念親益昭  
聖德凡預載持之數共懷怵惕之思中慰共惟  
陛下以大孝而顯揚任姒之德音以至尊而度  
越參騫之高行當萬國貢珍之在列嘆東朝靈  
几之方新佩響唐宮莫展壽觴之禮鍾鳴漢殿  
暫停元會之儀願寬追遠之心茂對履端之序  
臣猥將隆指不獲躬詣東上閤門臣無任

冬至慰表

周必大

化國日舒徐行北陸聖人孝至永念東朝凡在  
輿情同深孺慕中慰共惟陛下德隆天性報  
厚母慈當宮線之初添悵禕衣之浸遠率百官  
而為壽忍虛興慶之彛儀幸舊宅而會冬益愴  
永平之故事願抑對時之感俯安率土之心

同前

周必大

望雲氣於觀臺甫驗新陽之至斷鍾聲於長樂  
莫陳亞歲之儀上切哀恫下均感慕中慰共惟



陛下行高文帝孝邁有虞誦凱風聖善之詩悵  
六駝之永隔當化日舒長之候視一線以增悲  
仰祈宸抱之少寬式副天心之來復

同前

周必大

亞歲甫臨方講漢儀之舊徽音寢遠共深文母  
之思遙知睟穆之光正切哀恫之慕中慰共惟  
陛下道同堯舜行過淵騫罷長樂之壽觴深悲  
節物望慈寧之總帳益動孝思願寬追遠之懷  
庶對履長之序

皇太子薨慰

皇帝表

趙汝談

皇支殞秀國嗣告凶地驚少海之翻天慘前星  
之掩矧凡黔首能不悼中慰共惟陛下道  
冒群倫仁懷庶類哀元良之不淑惻慈念以何  
堪雖寢門常時遂缺三朝之禮然宗廟重事當  
圖萬世之基願釋聖心以安寓內

皇太子薨慰

皇后牋

震宮有變不勝喪亡之驚坤載曷寧遂失維城  
之望中慰共惟殿下母儀德備子育恩深憫  
羽翼之已成渣霜露而先殞追惟孝愛誠難割



於至懷開悟聖聰尚力扶於大計  
古詩

祖龍行

韋楚老

黑雲兵氣射天裂壯士朝眠夢寃結祖龍一夜  
死沙丘胡亥空隨鮑魚轍腐肉偷生二千里僞  
書先賜扶蘇死暮接驪山土未乾瑞光已向芒  
碭起陳勝城中鼓三下秦家天地如崩瓦龍蛇  
撩亂入咸陽少帝空隨漢家馬  
律詩

太宗皇帝挽歌

王元之

卜世知無極上僊安可尋祝堯違衆望傳啓合  
天心陵栢蕭騷韻階茅寂寞陰何人開殿閣塵  
暗九絃琴  
舜化無偏黨堯年欠耄期世間人自哭天上事  
難知終遜東封禮遂成南狩悲金鑾舊學士頭  
白涕漣沔

日到虞泉落天從杞國崩去年壽寧節今夕永  
熙陵薤露悲風起松阡苦霧凝龍髯攀不及千  
古恨難勝

仁宗皇帝挽詞四首



王安石

去序三朝聖行崩萬國天憂勤無曠古治洽最  
長年仁育齊高厚哀思罄幅員欲知千載美道  
德冠遺編

憑几微言絕群臣涕泗揮哀號三級陞縞素九  
重圍天上仙遊遠宮中御座非最悲帷幄侍不  
復未明衣

厭代人間世收神天上游遽然虛玉座不復望  
珠旒待旦移中幘饗人改饌羞事見羊尋常飛  
白几寂寞暗塵浮

同軌群方至因山七日催永違天日表空有肺  
肝摧帳斃流蘇卷鈴歌薤露哀宮中垂曉輶西  
去不更回

仁宗皇帝挽詞

歐陽脩

王者居尊本無外由來天下以爲家六龍白日  
乘雲去何用金錢買道車

苦霧霏霏着彩旗猶排吉仗雜凶儀常時鳳輦  
嬉遊處今日龍車慟哭隨

都人擾擾塞康莊西送靈車過苑牆金鼎藥成  
龍已去人間惟有鼠拖腸



素幙悠悠逗曉風行隨哀挽出深宮妃嬪莫向  
蒼梧望雲覆昭陵洛水東  
叨陪法從最多年慣聽梨園奏管絃從此無因  
瞻黼座惟應魂夢到鈞天

神宗皇帝挽詞

黃庭堅

文思昭日月神武用雷霆制作深垂統憂勤減  
夢齡孫謀開二葉末命對三靈今代誰班馬能  
書汗簡青

鈞築收賢輔天人與聖能輝光唐六典度越漢  
中興百世神宗廟千秋永裕陵帝鄉無馬

跡空望白雲乘

昔在基皇極師臣論九疇丘陵忽為谷天地不  
藏舟河洛功無憾幽燕策未收嗣皇朝萬國  
任姒正興周

孝宗皇帝挽章

朱熹

精一傳心妙文明撫運昌乾坤歸獨御日月要  
重光不值亡胡歲何由復漢疆遽移丹極仗更  
上白雲鄉九有哀同切孤臣淚特滂詎因逢舜  
日曾得廁周行但憶丹墀引頻瞻黼座旁袞華  
叨假寵縞素識周喪似有鹽梅契還嗟貝錦傷



戴盆驚委照增秩侍行香手疏攄丹悃衡程發  
皂囊神心應斗轉巽令亟風揚未答隆儒厚俄  
聞脫屣忙此生知永已沒世恨空長內難開新  
玉道歸立右廟因山方慘澹去國又愴惶疾病  
今如許形骸可自量報恩寧復日忍死續殘章  
高宗皇帝挽詞 葉適

何止超前代功隆道更尊幾同造區夏還復外  
乾坤黃屋堯年度青山禹穴昏遺民猶望幸淚  
血洒中原

河濟初開府江淮晚視師續戎由子聖永命獨

天知鶴唳空虛警雲生仗自移

厭代之夕都下

相傳有彩雲翔鶴之異

上哀何以稱卒伐繼周

詩

孝宗皇帝挽詞

葉適

儉德加文景雄謨酌武宣道終遺萬乘喪已盡  
三年暫乞狂胡命常持復漢權全將一孝字高  
謚百王前

昔年叨上殿歎息動宸襟豈不人思奮其如天  
意深帝王猶遇合南北限升沉尚有登遐日將  
軍特賜金



御製 寧宗皇帝挽詞

我宋書開洛炎圖統得天年推 仁祖久曆至  
紹興綿 孝廟鴻謨永 光皇寶祚延四朝各  
三紀盛德洽民編

冲澹凝金永憂勤失寶丹講餘曦已午班促漏  
方殘濟野雲生暗蒼梧日轉寒列朝從 藝祖  
天闕會金鑾

僊御賓空日龍飛杳杳間五霞呈瑞彩九虎敞  
重關寶輦扶蒼鶴雲韶擁玉班千年樓佛地今  
日覩天顏

莊惠皇后挽歌應制

宋庠

媯幄柔明訓堯闡保護賢別居長樂寢讓給水  
衡錢謹疾方加膳收神亟去仙宸襟增服紀追  
報煥終天

昔帝推嬪則吾君賴母慈陪陵漢家葬異室闕  
宮祠霧暗星軒隱天愁月御移翟車參享路無  
復廟中期

莊獻明肅太后挽詞應制

宋庠



寶慈垂母訓一紀御璿除地有占沙舊天仍補  
石餘軒星淪夕緯翟輅去宸居異日金滕啓方  
知復辟書皇太后上僊後於巾箱中得復辟詔  
章  
肝吳身無憚寒暄疾有加災生織女柰魂斷濯  
龍車廢髮浮晨旭邊簫咽暝霞唯留長樂注刊  
美在皇家

太皇太后挽詞二首

王安石

國賴姜任盛門歸馬鄧高關睢求窈窕卷耳念  
勤勞聖淑才難擬休明運繼遭岡原今獻卜黼  
衮正攀號

塗山女德茂京室母才難具美多前志餘光永  
後觀遺衣遷館御祖載出宮策終始神孫孝長  
留萬國歡

皇太后挽詞

陳師道

德名三后並母道兩朝尊勇決高千古危疑定  
一言先朝還政事隆禮改山園哀挽西郊道雲  
愁晝亦昏

扶日行黃道乘雲上紫微憂勞形末命恭儉見



陳衣布德開刑網和戎戢武威要知懷惠處行  
路涕交揮

隆祐皇太后挽詞 汪藻

四紀居坤極三朝賴母臨德齊先后懿恩及聖  
君深冊寶追崇德衰麻欲報心哀榮千古事誰  
復嗣徽音

慶源由魏國奉事及宣仁盛德儀中壺私恩絕  
外親長秋期不老厚夜忽无晨來歲柔桑綠誰  
臨繭館春

朔漠遐征後南州倣擾時人心憂社稷天意屬  
簾帷擁佑千齡主圖回萬世基中興能事畢倏  
與帝鄉期

悼懷太子挽歌詞 白居易

竹馬書薨歲銅龍表葬時永言窀穸事全用少  
陽儀壽夭由天命哀榮出聖慈恭聞袞贈詔軫  
念在輿夷

剪葉藩封早承華冊命尊笙歌辭洛苑風雪蔽  
梁園鹵簿凌霜宿銘旌向月翻宮寮不建事哭  
送出都門

詩話



玉欄牡丹

慈聖光獻皇后薨上悲慕甚有姜識者能神術使死者復生上命試其術無效乃曰臣見太宗與仁宗宴臨白玉欄千賞牡丹無意復來人間上知妄誕亦不深罪斥郴州蔡承禧挽詞曰天上玉欄花已拆人間方士術何施謂此也

新編古今事文類聚卷之四十九

前集

新編古今事文類聚卷之五十

前集

建安祝穆和父編

喪事部

園陵 葬附

羣書要語

天子之殯也萊塗龍輅以棺加斧於擲上畢塗屋天子之禮也 檀弓

顏柳曰天子龍輅而擲幃 同上 子夏曰聖人之葬人與人之葬聖人也子何觀焉 同上 巾車掌大喪飾遣車遂廡之行 注 廡興也謂陳駕之行



之使人以次舉之以如墓也遣車一曰鸞車春

官遂師大喪共蜃或作樽或作車之役柩路載

柳四輪迫地而行有似於蜃因取名焉行至壙

乃說更載以龍輜地官馮相告稷宸駕長往謝

眺冊文鳳翼啓行龍輜在御吳類要慕龍輜而

不駐瞻鳳綵以方遙敬宗實錄因山為墳元宗

哀冊淚為雨於宸極哭成雷於郊郭同上下蘭

皋兮背芷陽旌悠悠兮野蒼蒼帶白花兮掩淚

衣去粉兮斷腸當盛明兮共樂忽幽處兮獨傷

去故庭兮日遠即新宮兮夜長德宗皇后冊文

擁馳道兮皆往獨官車兮不歸元宗哀冊假令

愚民取長陵一抔土何以加其法乎張釋之傳

**詩句**崇樹加園塋顏延年拜陵陵色轉蔥青選

**古今事實**

橋山劍舄

黃帝葬於橋山南空棺無尸唯劍舄在史記漢

武帝因巡朔方還祭黃帝於橋山上曰吾聞黃

帝不死有冢何也公孫卿對曰黃帝已仙上天

群臣葬其衣冠史記

舜葬蒼梧



舜葬蒼梧之野有鳥如丹雀名曰憑霄自丹洲而來銜青沙珠積成壠阜名曰珠丘拾遺記

### 水齧王季墓

惠子曰滕文公卒葬有日矣天大雨雪至半月群臣請弛期太子不許惠子諫曰昔王季葬渦水之尾樂水齧其墓見棺前和文王曰先君殆見群臣百姓矣乃出其棺三日而後葬今太子亦宜曰先君欲少留而撫社稷故使雪甚弛期而更為曰此文王義也太子曰善呂氏春秋

### 虎丘金精

吳王闔閭葬虎丘山下發吳都之士十萬人共治葬穿土為川積壤為丘池廣六十步水深一丈五尺銅棺三重瀕池六尺黃金珠玉為鳧雁扁諸之劍魚腸之干在焉葬三日金精上騰為白虎蹲踞于上因名虎丘越絕書

### 葬近二陵

秦夏太后卜葬曰東望吾子莊襄王西望吾夫葬芷陽

孝文王  
葬壽陽

### 驪山侈葬

始皇葬於驪山吏徒數十萬人曠日十年下徹



三泉合采金石治銅錮其內漆塗其外被以珠玉飾以翡翠中成游觀上成山陵為葬埋之侈至於此使其後世曾不得蓬顆蔽家而託葬焉

祭自秦始

古不祭墓始皇起寢殿於墓側漢因不改四時

上飯漢官儀

漢文灞陵

漢文帝治灞陵皆以瓦器不得以金銀銅錫為之因其山不起墳本紀灞陵不起山陵稠種栢

樹三輔黃圖將兵護諸陵漢官儀

灞陵石擲

張釋之從文帝行至灞陵上使慎夫人鼓瑟上自倚瑟而歌悽然悲懷顧謂群臣曰嗟乎以北山石為擲用紵絮斲陳漆其間豈可動哉左右皆曰善釋之前曰使其中有可欲雖錮南山猶有隙使其中無可欲雖無石擲又何戚焉文帝稱善

為食官令

馮參昭儀少弟以嚴見憚不得親近侍帷幄以王舅出補渭陵食官令以數病徙為寢中郎注



食官令給陵上祭祀之事

復土將軍

文帝遺詔曰郎中令張武為復土將軍發近縣卒萬六千藏擲穿復土屬將軍武注主穿壙填瘞事

得殯時物

武帝崩遺詔以雜道書三十卷致於棺中貯之金箱卷後題東宮臣名年月河東太守張純以書進宣帝帝示左右時有武帝典書中郎毋登見書及箱流涕曰此先皇殯時物臣此時着棺

中因何得出宣帝愴然驚愕以書付武帝廟中其茂陵宛然如故庾信賦云茂陵之書空聚即此也內傳

珠襦玉匣

漢帝及侯王送葬者皆珠襦玉匣形如鎧甲連以金鏤匣上皆鏤以蛟龍鸞鳳龜鱗之象時謂蛟龍玉匣西京雜記九竅加以黃金則死者不朽晏類要

盜發諸陵

赤眉賊帥樊宗陷長安發掘諸陵取其寶貨凡



所發有玉柙殮者皆如生故赤眉多行淫穢唯  
灞陵杜陵完 五代温韜在梁為耀州節度唐  
諸陵在境內者悉發之取所藏金寶而昭陵最  
固悉藏前世圖書鍾王紙墨筆迹如新莊宗滅  
梁韜來朝郭崇韜曰此劫陵賊罪不可赦韜納  
賂劉后遽遣還鎮明宗時賜死

### 裁令流水

光武初作壽陵

自文帝以後皆預作陵

將作大

匠竇融上言園陵庶哀無所用帝曰古者帝王  
之葬皆陶人瓦器木車茅馬使後代之人不知  
其處今所制不過二三頃無為山陵陂池裁令  
流水而已

### 掃地露祭

明帝遺詔無起寢廟園陵掃地露祭率天下以  
儉

### 天祿辟邪

後漢靈帝時鑄天祿蝦蟆吐水於平門外注今  
鄧州南陽縣北宗資碑旁有兩石獸鐫其膊一  
曰天祿一曰辟邪據此即天祿辟邪並獸名漢  
天祿閣亦因獸以立名 右漢天祿辟邪四字



在宗資墓前石獸膊上按後漢書宗資南陽安  
衆人也今墓在鄧州南陽界中墓前有二石獸  
刻其膊上曰一曰天祿一曰辟邪余自天聖中  
舉進士往來襄鄧間見之道側迨今三十餘年  
矣其後集錄古文思得此字屢求於人不能致  
尚書職方員外郎謝景初家於鄧爲余模得之  
字或訛缺不若余見時完也 歐文

旣葬隋亡

隋文帝仁壽二年皇后獨孤氏崩上令儀同三  
司蕭吉爲皇后擇葬地得吉處云卜年二千卜

世三百上曰吉凶由人不在於地高緯葬父豈  
不卜乎俄而國亡正如我家墓田若云不吉朕  
不當爲天子若云不凶我弟不當戰沒然竟從  
吉言吉退告族人蕭平仲曰後四載太子御天  
下若太子得政隋其亡乎吾前給之卜年二千  
者二十字也卜世二百者取世二傳也汝識之  
詔從儉約

唐太宗正觀十一年詔恐身後子孫習於流俗  
加四重之櫬伐百祀之木崇厚墳陵今頒此制  
務從儉約於九巖之山足容一棺而已木馬塗



車由桴葦籥事合古典不為時用

### 詐望昭陵

長孫皇后既葬太宗即苑中作層臺以望昭陵引魏徵同升徵視曰臣眊昏不能見帝指示之徵曰此昭陵邪帝曰然徵曰臣以為陛下望獻陵若昭陵臣固見之帝泣為毀臺

### 縣奉八陵

寶曆元年勅奉先一縣獨奉八陵供辦支措實為繁併宜委京兆府減一半租并雜色役令諸縣均出敬宗實錄

### 蘭亭殉葬

見字學門

### 紙斂瓦棺

五代周太祖屢戒晉王曰昔吾西征見唐十八陵無不發掘多藏金寶故也我死當衣以紙斂以瓦棺勿作石羊虎

### 寒食出祭

奉先之道無寒食野祭之禮近代莊宗每年寒食出祭謂之破散五代會要劉知遠殺李從益

王淑妃曰何不留吾兒使每歲寒食以一盂麥飯洒明宗陵乎五代史



宋朝陵名

太祖昌陵

太宗熙陵

真宗定陵

仁宗昭陵

英宗厚陵

神宗裕陵

哲宗泰陵

徽宗佑陵

欽宗寧陵

高宗思陵

孝宗阜陵

光宗獻陵

寧宗茂陵

皇堂棟損

仁宗永昭葬且有日忽傳皇堂棟損時諸使皆欲不問而掩之韓公琦正色曰不可果損當易之若違葬期侈所費此責猶可當若苟且掩之

後有壞而致人主疑心臣下何以當責遺事

書責時宰

仁宗山陵韓魏公為使時國用窘匱而一用乾典故事或以為過蘇明允為編禮官以書責公至引宋華元厚葬事以為不臣魏公得之矍然已乃斂容起謝曰某無狀敢不奉教然華元事莫未至是時聞者無不服公大度能受意外之言也

石林燕話

擅移山陵

入內押班雷允恭擅移永定陵皇堂而丁謂



其之朝廷命呂許公與魯肅公乘傳按視盡得其迹及允恭等盜沒方中金寶以萬計狀聞抵允恭罪而謂罷相

護葬訖去位

韓魏公嘉祐末以翊戴功輔英宗既為永昭山陵使事畢而上不豫矣不敢辭位越四日而永厚鼎成以元宰復護葬于洛魏公先自上疏云自有唐至于五代山園使事訖求去今先帝已附廟而臣時為山陵使事恬然不能援故事去位則是不知典故何以勝天下之責

雖陛下欲以私恩留臣顧中外公議且謂臣何神宗再三留之卧家不出遂以司徒兩鎮節度使判鄉郡相州元祐末章子厚為永泰山陵使子厚專權人情鬱陶有曾誕敷文者作詞畧云草草山陵職事厭厭罷相情懷謂故事也紹興間會稽因山泰會之為固位之計乃除孟仁仲為樞密使以代其行仁仲不悟其機事畢猶入國門會之怒諷言路引以論列出典金陵揮塵錄

山陵非宰相護送



永祐之權殯也宰相秦會之不欲行乃命信安  
孟王忠厚以樞密使爲之及營思陵備置五  
使遂命右相周益公掩殯宮從所請也時左相  
王季海以母老惡凶事故不欲行然陵成而王  
卒罷永阜之役既命左相留仲至未葬而仲  
至逐右相趙子直亦不欲行乃以少傅保寧軍  
節度使郭師禹爲總護使而命參知政事余處  
恭持節導拜梓宮既葬師禹封永寧郡王子  
直遂得罪慶元末永崇陵將復土右相謝子  
肅亦不行乃命平原王韓侂胄焉山陵非宰相  
護送遂爲故事朝野雜記

### 權名殯宮

紹興初昭慈聖獻皇后升遐欲建山陵外祖  
曾公議以謂帝后陵寢今存伊洛不日復中原  
即歸祔矣宜以殯宮爲名僉以爲當用之揮塵

### 古今文集

#### 女媧陵記

喬潭文粹

登黃龍古塞望洪河中流巋然獨存大浸不溺  
者媧皇陵也夫巨靈擘太華蹠首陽導河而東  
以洩憤怒雖有重丘大阜險狹之口罔不漱之



為黃壤汨之於旋波不可復振奔崩而下矣女  
媧氏已然之後豁然之衝天險束阨風濤鼓作  
乃能中乾外禦特立萬年其憑神可知也水無  
盈縮之度陵有高卑之常霖潦漲之兩涘沒矣  
於是乎不為之小而就其深旱暵滲之孤嶼出  
矣於是不為之大而就其淺非夫巨靈壯趾以  
固本河伯高肩以承隅胡然動靜如因其時升  
降不失其則羅浮二岳以風雨合離蓬萊五山  
以波濤上下不復故道遂違常流甚相遠矣君  
子曰夫能屠黑龍涸九州况乎一水之上而自

為謀夫能斷鰲足立四極况乎數仞之高而自  
為力神人之異昧者難知密邇山谷森羅物象  
莽莽蘆渚寧非止水之餘嶰嶰石林猶有補天  
之色搖演空曲精靈若存且夫上無積草表以  
孤樹常感風氣纖條悲鳴若冥應肱響鼓簧而  
吹笙由是憧憧往來無不加敬山有梅栗關吏  
羞焉水有菱芡舟人奠焉塚之木無或斬焉陵  
之土無或抔焉是則馨香已陳而樵蘇自禁矣  
故聖人取薄葬去厚送驪山之銀海魚燈虎丘  
之金精龍劔錮之其內散之其間適為大盜之



守未足藏身之固彼橋山帝丘九疑會稽皆因  
山而墳未聞其城者余謂媯皇受命在火火以  
示水谷不為陵開門負固日用其力不然其隙  
地豈必封崇乎是故觀而志之為城塚後記

諫厚葬疏

劉向

棺郭之作自黃帝始黃帝葬於橋山堯葬濟陰  
丘壠皆小葬具甚微舜葬蒼梧二妃不從禹葬  
會稽不改其列殷湯無葬處文武周公葬於畢  
在鄗東南無墳壠建至吳王闔閭違禮厚葬十  
有餘年越人發之及秦惠文武昭襄五王皆大

作丘壠多其瘞藏咸盡發掘暴露心足悲也始  
皇葬於驪山之阿下錮三泉上崇三墳其高十  
丈周回五里有餘石槨為游館人膏為燈燭水  
銀為江海黃金為鳧鴈珍寶之藏機械之變棺  
槨之麗宮館之盛不可勝原又少殺宮人生埋  
工匠計以萬數驪山之作未成而周章百萬之  
師至其下矣項籍燔其宮室塋宇往往咸見發  
掘其後牧兒亡羊入其鑿牧者持火照求羊失  
火燒其藏槨自古及今葬未有盛如始皇者也  
數年之間外被項籍之災內罹牧豎之禍豈不



哀哉

諫山陵厚葬書

虞世南

臣聞古之聖帝明王所以薄葬者非不欲崇高光飾珍寶貝物以厚其親然審而言之高墳厚壙珍物畢備此適所以為親之累非曰孝也昔漢成帝造延昌二陵制度甚厚功費甚多諫大夫劉向上書孝文寤而遂以薄葬又漢氏之法人君在位三分天下貢賦以一分入山陵武帝歷年長久比葬陵中不復容物霍光暗於大體奢侈過度其後至更始之敗赤眉賊入長安破

茂陵取物猶不能盡無故聚歛百姓為盜之用甚無謂也魏文帝於首陽東為壽陵作終制其畧曰昔堯舜壽陵因山為體無封無樹無立寢殿園邑為棺槨足以藏骨為衣裳足以朽肉吾勞心不食之地欲使易代之後不知其處無藏金銀銅鐵一以瓦器自古及今未有不亡之國無不掘之墓喪亂以來漢氏諸陵無不發掘及至燒取玉匣金縷骸骨并盡乃不重痛哉若違詔妄有變改吾為戮屍於地下死而重死不忠不孝使魂而有知將不福汝以為永制藏之宗



廟魏文之制可謂達於制矣伏願陛下深覽古今爲長久之慮臣之赤心惟願萬歲之後神道常安陛下石揚於宗廟耳書奏不報

很石銘

皇甫湜

很石蒼蒼驪山之傍鏡朴礧癢嶷然西方昔秦皇帝謀之不臧七十萬人茲焉惶惶發石此山言礎於墳若有憑依屹住中達淫刑斲迫人力無施故老相傳以很名之自昔太古不封不樹有葛於溝有薪於野後聖有作緣情不忍爲之棺擲其在唐虞則維窾木噫嘻暴虐用其人

墳而象山下錮三泉竄珍總竒力瘁財殫驅之而前如刈草菅天毒其衷神憤其凶謫戍一呼九州風從白挺荆棘指麾嶂潼險阻不闔干戈倒鋒屍露于劫隧燔于童蓬顛無依不十年中禹葬會稽不改其行聖德洋洋厥響久長至于漢劉釋之有言中如可欲猶隙南山矧私其身以盡其人刻詞很石炯戒千春

漢帝葬儀

天子葬幙中黃門虎賁各二十人執紼司空擇土造穿太史卜日將作黃腸題湊便房如禮大



駕太僕御方相氏黃金四目蒙玄衣熊皮朱裳  
執戈揚楯立乘四馬朱驅旂長三仞十有二旒  
曳地畫日月升龍書旒曰天子之柩謁者二人  
立乘六馬爲次太常跪哭曰十五舉音止哭畫  
漏上請發司徒河南尹先引車騎太常曰請拜  
送車著白絲三糾紼長三十文圍七寸六行行  
五十人公卿以下子弟凡三百人皆素幘委貌  
冠衣素裳挽校尉三百人皆赤幘不冠持幡幢  
皆銜枚羽林孤兒巴俞耀徒了切歌者六十人爲  
六列司馬八人執鐸至陵南羨門司徒跪請就

下房都導東園武士奉入。旁執事下明器太祝

進醴獻司空將校復土續 卷書

本朝陵名犯前代

紹興己未春 徽宗梓宮歸宰臣上陵名永固

有王銍者言犯後魏明帝後周文宣二后陵名

下祕書省參考如銍言遂改名永祐然漢平帝

後漢殤帝十國劉龔同曰康陵 本朝順祖亦

曰康陵後魏明帝後周宣帝唐中宗同曰定陵

本朝翼祖亦曰定陵前漢惠帝唐懿宗王后同

曰安陵 本朝宣祖亦曰安陵唐太宗曰昭陵



本朝仁宗曰永昭陵後魏宣武后曰永泰陵唐  
元宗曰泰陵 本朝哲宗亦曰永泰陵蓋本  
朝陵名犯前代陵名者不一 祖宗以來不避  
也聞見錄

古詩

橋陵三十韻

杜甫

先帝昔晏駕茲山朝百靈崇岡擁象設沃野開  
天庭即事壯重險論功超孟丁坡坨因厚地却  
略羅峻屏雲門虛冉冉風雲肅泠泠石門霜露  
白玉殿莓苔青宮女睡知二祠官朝見星空梁

簇畫戟陰井敲銅瓶中使日夜繼惟王心不寧  
豈徒郵備享尚謂求無形孝理敦國政神疑推  
道經瑞芝產廟柱好鳥宿巖局高岳前律萃洪  
河左溼澗金城蓄峻趾沙苑交迴汀永與奧區  
固川原紛眇冥居然赤縣立臺榭爭岌亭官屬  
果稱是聲華真可聽王劉美竹潤裴李春蘭馨  
鄭氏才振古啖侯筆不停遣辭必中律利物當  
發鈿綺繡相展轉琳琅愈青熒側聞魯恭化秉  
德崔瑗銘太史侯晃影王喬隨鶴翎朝儀限霄  
漢客思迴林垆輒軻辭下杜飄颻凌濁涇諸生



舊短褐旋泛一浮萍荒歲兒女瘦暮塗涕泗零  
主人念老馬廨宇容秋螢流寓理豈愜窮愁醉  
未醒何當擺俗累浩蕩乘滄溟

始皇陵下作

曹鄴

千金買魚燈泉下照狐兔行人上陵過却弔扶  
蘇墓壘壘壙中物多於養生具若使山可移應  
將秦國去舜沒雖在前今猶未封樹

七哀詩

張孟陽

北邙何纍纍高陵有四五借問誰家墳皆云漢  
世主恭文遙相望原陵鬱膺膺季世喪亂起盜  
賊如豺虎毀壤過一杯便房啓幽戶珠押離玉  
體珍寶見剽虜園寢化爲墟周墉無遺堵蒙籠  
荒荆棘蹊逕登童豎狐兔窟其中荒穢不復掃  
頽墮並墾發萌隸營農圃昔爲萬乘君今爲一  
丘土感彼雍門言悽愴哀往古

感興

蘇子美

後寢藏衣冠前廟宅神主吾聞諸禮經此制出  
中古秦嬴食先法乃復祭於墓漢衣以月遊於  
道蓋無取宣帝尊祖廟失制徧九土孝元酌前  
文一旦悉除去魏帝樂銅臺遺令置歌舞昏嗣



竟從之此事狂夫阻唐制益紛華諸陵鎖嬪御  
曠女日哀吟於先亦奚補吾朝三聖人乘雲不  
可覩威靈已霄漢嗣皇念宗祖繪事移天光刻  
象肖神武徧勅舊遊地輸材起宮宇階城鈿以  
金墻壁衣之黼功旣即奉迎法仗疊簫鼓玩好  
擇珍竒目奪不可數三京佛老家已有十數處  
朝家雖奉先越禮古不許君不祭臣僕父不祭  
支庶丹楹豈非孝聖貶甚蕭斧大祀當以時寢  
廟即其所惜哉恭儉德乃爲侈所監痛乎神聖  
姿遂與夷爲侶蒼生何其愚瞻歎走旁午賤子  
私所嘆傷時淚如雨

豐陵行

韓愈

羽衛煌煌一百里曉出都門葬天子羣臣雜沓  
馳後先官官穰穰來不已是時新秋七月初金  
神按節炎氣除清風飄飄輕雨灑偃蹇旂旒卷  
以舒踰梁下坂笳鼓咽帶嶮遂走玄宮間哭聲  
訇天百鳥噪幽坎晝閉空靈輿皇帝孝心深且  
遠資送禮備無贏餘設官置衛鎖嬪妓供養朝  
夕象平居臣聞神道尚清淨三代舊制存諸書  
墓藏廟祭不可亂欲言非職知何如



題奉先寺

張文潛

荒涼城南奉先寺後宮美人皆葬此角樓相望  
高起墳草間栢下多石人秩卑焚骨不作塚青  
石浮屠當丘壠家家墳上作享亭朱門相向無  
人聲樹頭土梟作人語月黑風悲鬼搖樹宮女  
養女作子孫年年犢車來作主廢后園林官路  
側家破無人掃墳域官家歲給半千錢街頭買  
餅作寒食

律詩

行次昭陵

杜甫

舊俗疲庸主羣雄問獨夫讖歸龍鳳質威定虎  
狼都天屬尊堯典神功協禹謨風雲隨逸足日  
月繼高衢文物多師古朝廷半老儒直詞寧戮  
辱賢路不崎嶇往者災猶降蒼生喘未蘇指麾  
安率土盪滌撫洪鑪壯士悲陵邑幽人拜鼎湖  
玉衣晨自舉石馬汗嘗趨松栢瞻靈殿塵沙立  
瞑途寂寥開國日流恨滿山隅

古蛾眉怨言漢武事

王翰

宮車晚出向南山仙衛逶迤去不還朝脯泣對



麒麟樹樹下蒼苔日漸班

仁宗昭陵有人題此詩韓子蒼云不著姓氏宜表而出之

農桑不擾歲常登邊將無功吏不能四十二年如夢覺春風吹淚過昭陵

詩話

吳臺逢後主

隋煬帝初葬吳公臺下後大唐平江南改葬雷塘吳公臺在揚相以陳將吳明徹得名在江都縣西北四里雷塘在縣東北十里按大業拾遺

載帝昏酒滋深嘗行吳公臺下恍惚與陳後主遇後主云每憶張麗華方憑臨春閣作壁月詞未終見韓擒虎躍領萬騎直來衝人便至今日始謂殿下政治在堯舜之上今日還此逸遊曩時何見罪之深也帝叱之不復有睹故東坡號國夜遊圖詩云人間俛仰成今古吳公臺下雷塘路當時亦笑張麗華不知門外韓擒虎

金粟岡

唐舊紀明皇朝拜五陵至橋陵見金粟山岡有龍盤鳳翥之勢復近先塋謂侍臣曰吾千秋萬



歲後宜葬此地得奉先陵故杜甫曹將軍畫馬  
圖引曰自從獻寶河朝宗無復射蛟江水中君  
不見金粟堆前松栢裏龍媒去盡鳥呼風

發引二詞

昭陵梓宮發引王禹玉作清平調二曲云玉宸  
朝晚忽掩赭黃衣愁露鎖金扉蓬萊待得仙丹  
至人世已成非龍軒長仗轉西畿旌旆入雲飛  
望陵宮女垂紅淚不見翠輿歸又云上林春晚  
曾奉玉宸遊水殿戲龍舟玉簫聲斷催仙馭一  
去隔千秋遊人重到曲江頭事往涕難收空餘

御幄傳觴處依舊水東流倦游



新編古今事文類聚卷之五十

前集



新編古今事文類聚卷之五十





